

國藥詮證

卷二



國藥詮證卷二

寶山王劍賓著

桑根白皮

性味 甘寒無毒

效用 主傷中五勞六極羸瘦崩中絕脈補虛益氣

說明 桑根白皮性味甘寒。甘能和氣。寒能清熱。本經以其能補虛益氣。而主治傷中。五勞六極羸瘦。崩中絕脈。別錄去肺中水氣。治唾血熱渴。水腫腹滿。臘脹。利水道。可知桑根白皮。有清熱利水之效。故李時珍主瀉肺。利大小腸。降氣散血。本經之所謂補虛益氣。係以瀉爲補。是瀉其有餘。並非補其不足也。肘後方治血露不絕。千金方傳石癰堅硬。證明其不但可以瀉肺。並能散血也。是五勞六極。崩中脈絕。均爲氣血熱結之證。故以清熱散結爲治也。若



誤會補虛益氣之說。而用治純虛之證。則適得其反矣。

○桑白皮散 治上焦熱壅。血腥煩嗽。連聲併氣。不得透。

桑白皮 桔梗 川芎 防風 薄荷 黃芩 前胡 柴胡

赤茯苓 炒枳殼 甘草

○補肺湯 治勞嗽

桑白皮 熟地黃 人參 紫苑 黃耆 五味子

○瀉白散 治肺熱咳。手足心熱

桑白皮 地骨皮 甘草

第一方以桑白皮。前胡。瀉肺。桔梗。防風。薄荷。散氣。川芎。行氣。黃芩。清熱。柴胡。枳殼。利氣。紫蘇。葉。赤茯苓。散血。甘草。和氣。本方所治之病。爲氣血阻滯所致。所謂上焦熱壅。因氣阻而發炎。故以瀉肺爲主。清熱爲次。通阻則熱自退也。氣阻之後。血亦不能暢行。是以兼用散血之藥。惟究非血病。不能純用血藥。



故以紫蘇葉赤茯苓兼治氣血。此二味可以行氣。亦可以散血也。第二方以桑白皮清熱瀉肺。熟地黃散濕利氣。人參黃耆益氣。五味子斂氣。紫苑散結降氣。此方所治之病。已處於不能瀉而不可不瀉之地步。故瀉肺藥中兼用益氣斂氣之藥。凡方之偏者。容易奏效。若過於中和。則敷衍而已。此方平妥有餘。而效力難見者。職是故也。第三方以桑白皮瀉肺熱。地骨皮散滯氣。清裏熱。而和之以甘草。此方簡單而極有組織。治氣中挾輕微之濕。而正在化熱者。必能奏效。以咳與手足心熱。均爲氣病。所用均爲氣藥。不輕不重。恰到好處也。

桑枝

性味 苦平無毒

效用 主偏體風癢。四肢拘攣。運肺氣利小便。

說明 桑枝有驅風散濕之效。故蘇頌主治遍體風癢。四肢拘攣等證。以驅風可以止癢。散氣可以舒筋。肺氣失調。則小便受阻。運肺氣卽所以利小便。本事方治風熱臂痛。聖濟總錄治水氣脚氣。皆取其驅風散濕之力也。

○桑枝煎 治風脚膝軟弱

桑枝 生附子 茄子根 黑豆 石斛 天雄 天麻 牛膝

桂心

右方以桑枝生附子天雄驅風散濕。茄子根散血。黑豆利腎。石斛除痺下氣。天麻散氣。牛膝利濕。川芎行氣。桂心散寒。脚膝軟弱。爲風濕阻滯所致。故以驅風散濕除痺行氣主治。

桑寄生

性味 苦平無毒



效用 主腰痛小兒背強癰腫安胎

說明 桑寄生性味效用均與桑枝相似以寄生於桑上感其氣也眞者或有特效然寄生既爲偶然之事而寄生於桑上更爲難得故昔人謂非自採卽難別如用者一多供不應求未有不以他樹之寄生充用者也故與自用桑寄生以求難知之效不若用桑枝之爲切實可靠也本經主治腰痛小兒背強癰腫安胎皆取其燥濕利氣之效

○桑寄生散 治胎漏經血妄行淋漓不已

桑寄生 當歸 川芎 續斷 阿膠珠 香附子 茯神 白朮

人參 甘草

右方以桑寄生香附子行氣逐濕當歸川芎續斷行氣和血阿膠珠散血人參益氣茯神白朮利濕甘草和氣胎漏起於氣之不和行氣逐濕以和其氣兼和其血益氣散血以安其胎桑寄生用者雖多是否有特效是否能得眞

者均成疑問。故以不用爲是。

柏子仁

性味 甘平無毒

效用 主驚悸益氣除風濕安五臟

說明 柏子仁性味甘平。潤中帶燥。能散風濕。本經主益氣者。以氣中有濕。散濕則有益於氣也。驚悸起於氣之不和。散濕則以可和氣而治驚悸。濕阻則氣滯而爲風。燥濕則氣暢而風散。五臟之風。不能外散。性潤燥之劑。可以之和之。此柏子仁之所以能安五臟也。故治大腸風秘。必以柏子仁爲主藥。昔人皆言其補。實則驅風散濕。皆偏於瀉。苟不推本窮源。明其效用。誤認爲補藥而服之者。未有不滋流弊者也。

○補肝湯 治肝氣不足兩脅下滿筋急不得太息四肢厥冷發搶心腹



痛目不明

山茱萸 甘草 桂心 桃仁 柏子仁 細辛 茯苓 防風 大棗

○經效阿膠丸 治勞嗽并嗽血吐血

阿膠珠 生地黃 山藥炒 卷柏葉 大薊根 五味子 雞蘇

茯苓 人參 百部 遠志 甘草 防風 麥冬 柏子仁

第一方以山茱萸歛肝氣。甘草大棗和氣。桂心散寒。桃仁散血。柏子仁細辛防風散風濕。茯苓利水。本方所治爲氣血阻滯之病。故驅風以利氣。散血以通阻。利水以散濕。風濕既去。猶恐其不和。故和之以甘草大棗。第二方以阿膠珠散血。生地黃清熱。遠志山藥收濕。卷柏葉大薊根止血。五味子歛氣。雞蘇散濕利氣。茯苓利水。人參益氣。百部殺蟲。甘草和氣。麥冬瀉肺。防風柏子仁驅風散濕。勞嗽吐血爲肺勞證象。有許多肺病皆爲肺由濕阻所致。故散濕則愈。惟既已吐血。不宜再用燥藥。但一味滋潤亦足助濕。本方潤中帶燥。

而兼用殺蟲藥。且注意於收濕。雖不能必其有效。而尙能處處顧到。

柏葉

性味 苦微溫無毒

效用 主吐血衄血痢血崩中赤白去濕痺生肌

說明 柏葉性味苦溫。苦能燥濕。溫能散血。故別錄主治血病。其止血之效。在燥濕散血。而不在清熱止血。張氏醫通。認爲清燥而無陽生之力。亡血虛家。不宜擅用。不知即使清燥。如因濕重熱重而吐血者。亦爲對證之藥。如亡血虛家。忌而不用。則濕不清熱不退而血不止矣。況柏葉原爲散血之藥。而並非清熱之藥。故楊氏方用以治中風不省。聖惠方用以治霍亂轉筋。張仲景用以治吐血不止也。散血之藥。所以與薑艾同用。若爲清血之藥。決不與薑艾同用。張氏醫通乃謂與薑艾同用。當無止慮矣。吐血不止。自求其止。惟清



熱止血散血止血其止同而所用之藥絕對不同。張氏醫通認定柏葉爲本寒之藥。不知其散血之效。故有此說。此醫家之所以須明藥效。並當知其何以有效。若知其所當然而不知其所以然。未有不誤人者也。

○柏葉湯 治吐血不止

乾薑 阿膠 柏葉 艾 馬通

○斷紅丸 治下血久不止虛寒色淡晦者

側柏葉 川續斷 鹿茸

第一方以乾薑散寒。阿膠散血。柏葉艾馬通逐寒散血。此方以通爲止。所治之病。並非血熱。而屬於寒滯血阻。故皆用溫散之藥。散寒逐濕。散血通阻。血得運行則不溢而自止矣。第二方以側柏葉散血。川續斷行氣活血。鹿茸散寒逐濕。此方與第一方所治之病。病源相同。惟吐下有不同耳。以側柏葉治虛寒下血。既可證明性溫。又可證明其散血。否則絕無可以止血之理也。續



南京中醫藥大學圖書館藏

斷能散氣血之滯。鹿茸能散腎經之濕。色淡暗。阻滯已久。而有不足之象矣。故溫下以益氣。如此治法。久可見功。難求速效也。

茯苓

性味 甘平無毒

效用 主胸脇逆氣。憂恚驚邪。恐悸。心下結痛。寒熱煩滿。咳逆。口焦舌乾。利小

便

說明 茯苓性味甘平。能利水濕。本經主治胸脇逆氣。以胸脇爲水濕所阻也。憂恚驚邪。恐悸。心下結痛。均爲濕病。蘊濕不化。則氣血運行受其阻滯。而憂恚驚邪。恐悸諸病作矣。寒熱煩滿。起於濕阻。阻則煩滿。化則爲熱。滯則爲寒。故時寒而時熱也。濕留於肺。則咳逆。濕阻中焦。則上氣不能下達。下氣不能上升。而口焦舌乾。小便不利。茯苓有收濕之力。故可以利水而通阻。或言其



上行。或言其下降。實則所治諸病。皆爲收濕之效。收肺濕則可以止咳。收腸濕則可以止瀉。收腎濕則可以通小便。如因濕盛而小便滑數者。收濕之後。可使之止。如因濕阻而大便不通者。收濕之後。可使之通。惟寒滯之濕。須用溫藥以回復其運化之力。非淡滲之劑所能疏利。此則治濕病者不可不知。亦爲用茯苓等淡滲之藥者所不可不知者也。

○茯苓桂枝甘草大棗湯 治發汗後臍下悸欲作奔豚

茯苓 甘草 大棗 桂枝

○茯苓杏仁甘草湯 治胸痹胸中氣塞短氣

茯苓 杏仁 甘草

○茯苓湯 治產後心悸不定言語錯亂恍惚

茯苓 甘草 芍藥 桂心 當歸 生薑 麥冬 大棗

第一方以茯苓利水。桂枝行氣散濕。而和之以甘草大棗。發汗臍下悸。上部

之濕已化。而下部之濕未化也。故用茯苓以疏利下部之水濕。桂枝以行氣散濕。使留滯之濕得以運化。便於疏利。經此變動之後。氣已浮越而不和。故治其病源之後。更注意於和氣也。第二方以茯苓利水。杏仁瀉肺。而和之以甘草。胸痹爲胸中有水濕積滯。肺氣不能運行所致。故以茯苓疏利水濕。杏仁瀉肺。以宣通肺氣。通利之後。猶恐氣之不和。故和之以甘草。第三方以茯苓疏利水濕。桂枝散濕。當歸行氣。甘草和氣。芍藥飲氣。生薑散結。麥冬瀉肺。大棗和胃。產後心悸。肺中積有水濕。氣血不和所致。故以茯苓疏利水濕。麥冬瀉肺。中積滯。並和其氣血。心悸由於濕阻。言語恍惚則氣阻所致也。

茯苓

性味 甘平無毒

效用 主胸脇逆氣。憂恚驚邪。心悸。心下結痛。寒熱煩滿。咳逆。口焦舌乾。利小

便

說明 茯苓與茯神主治相同。古方祇用茯苓而不用茯神。今人以茯苓利水濕。而以茯神治驚悸。實則二者無甚區別也。

○茯神湯 治產後心悸意志恍惚

茯神 人參 茯苓 芍藥 甘草 當歸 桂心 生薑

右方以茯神茯苓疏利水濕。人參益氣。芍藥斂氣。甘草大棗和氣。生薑桂心散寒。此方與茯苓湯所治之病相同。惟此方有人參而無麥冬。稍偏於補耳。

蔓荊子

性味 苦微寒無毒

效用 主筋骨間寒熱濕痺拘攣明目堅齒利九竅去白蟲

說明 蔓荊子性味苦寒。有燥濕清熱之效。凡濕之浮越者可以散。濕之入裏

者可以燥。可以清。本經主治筋骨間寒熱。與濕痺拘攣。均為在裏之寒熱。濕滯為寒。濕化則熱。燥濕則寒熱俱治也。明目亦為燥濕之效。非驅風之效也。時珍以氣清味辛。體輕而浮。上行而散。認為所主均為頭面風虛之證。與本經主治既有出入。性味變苦為辛。亦有寒熱之異。此不可從也。

○羌活勝濕湯 治外傷濕氣一身盡痛並通治濕證

羌活 獨活 藁本 防風 蔓荊子 川芎 炙甘草

○川芎行經散 治目中青翳如物傷狀重者白睛如血貫

枳殼 川芎 當歸 柴胡 炙甘草 白芷 防風 荊芥穗 薄荷

獨活 蔓荊子 羌活 紅花 茯苓 桔梗

○鼠粘子散 治面上風癢

鼠粘子 連翹 防風 荊芥 枳殼 桔梗 蔓荊子 白蒺藜

當歸 蟬蛻 厚樸

第一方以羌活藁本蔓荊子去濕獨活防風去風濕。川芎行氣。炙甘草和氣。凡濕病至一身盡痛。在濕化爲熱之候也。故兼用氣藥。以使之行而助其化。用風藥者。使之散也。第二方以枳殼川芎利氣。當歸紅花行血。柴胡炙甘草和氣。白芷防風荊芥穗薄荷獨活蔓荊子羌活桔梗驅風散濕。茯苓利水。肝氣不和。因血滯而目病。故以驅風散濕行氣活血主治。第三方以鼠粘子散風熱。連翹荊芥清熱散氣。枳殼利氣。桔梗清肺氣。防風白蒺藜蟬蛻散風濕。蔓荊子厚樸清濕熱。當歸行氣活血。面上風癢。故以驅風爲主。風濕相兼。故佐以散濕。濕去則氣和而風治矣。

槐實

性味 苦寒無毒

效用 主五內邪氣熱止涎吐補絕傷火瘡婦人乳癰子藏急痛

說明 槐實性味苦寒。有清熱燥濕之效。宗奭認爲風藥。故用以疏導風熱。好古認爲血藥。故曰治證與桃仁同。不知因濕滯而氣阻者。燥濕則自可利氣。因濕滯而血阻者。燥濕則自可散血。槐實祇能燥濕清熱。並不能驅風破血也。且所治均爲積濕化熱之證。有濕無熱者不能治。有熱無濕者亦不能治。本經主治五內邪氣熱。最爲確切。他如止涎吐。補絕傷。火瘡。婦人乳癰。子藏急痛。則爲一貫之濕熱病。故均可以清燥主治。別錄認爲可以墮胎。以其能下血也。實則槐實能下濕熱壅滯之血。決無可以墮胎之理。別錄之誤。正與好古相同也。

○槐子散 治濕痔痔有雌雄皆主之

槐子 乾漆 秦艽 吳茱萸根白皮 白芷 桂心 黃芩 黃耆

白欬 牡蠣 龍骨 雷丸 丁香 木香

○臟頭丸 治腸風下血脫肛